

Ni Pangulong
Dieter F. Uchtdorf

Ika-duhang Manuglaygay
sa Unang Panguluhan



Isa ka Laygay para sa Nagaalang-alang nga Misyonero

Ang mga disipulo ni Jesucristo may responsibilidad nga dalhon ang Iya ebanghelyo sa kalibutan (tan-awa sa Marcos 16:15–16). Pero, kon kaisa mabudlay ang magbukas sang aton mga baba kag maghambal parte sa aton pagtuo sa ila nga yara sa aton palibot. Bisan may pila ka miyembro sang Simbahang nga may natural nga abilidad nga makig-istorya sa iban parte sa relihiyon, may iban nga daw nagaalang-alang ukon basi natahap, nahuya, ukon nahadlok sa paghimo sini.

Bangud sina, luyag ko magrekomendar sang apat ka mga butang nga sarang himuong sang bisan sin-o agud sundon ang sugo sang Manluluwas nga iwali ang ebanghelyo sa “tanan nga tinuga” (D&C 58:64).

Mangin isa ka Iwag

Isa ko ka paborito nga hulubaton [saying] nga masami ginapatungod kay St. Francis sang Asisi ang mabasa, “Iwali ang ebanghelyo sa tanan nga tinion kag kon kinahanglan, maggamit sang mga tinaga.”¹ Ginalihangop sa sini nga hulubaton nga sa masami ang pinakamabaskog nga wali wala ginahambil.

Kon kita may integridad kag nagakabuhi suno sa aton mga sulukdan [standards], makatalupangod gid

ang mga tawo. Kon puno kita sing kasadya kag kalipay, mas matalupangdan pa gid nila.

Ang tanan gusto nga mangin malipayon. Kon kita nga mga miyembro sang Simbahang nagaiwag sang kasanag sang ebanghelyo, ang mga tawo makakita sang aton kalipay kag mabatyagan ang pagpalangga sang Dios nga nagapuno kag nagapalanglapaw sa aton mga kabuhi. Luyag nila mahibaloan kon ngaa. Luyag nila mahibaloan ang aton sekreto.

Nagatulod ini sa ila sa pagpamangkot pareho sang “Ngaa kamalipayon gid sa imo?” ukon “Ngaa daw pirme lang ka positibo sa imo?” Ang mga sabat sa sining mga pamangkot, siyempre, nagapadulong sa isa ka paghinambalanay parte sa ginpanumbalik nga ebanghelyo ni Jesucristo.

Mangin Maistoryahon

Ang pagbukas sang paghinambalanay parte sa relihiyon—labi na sa aton mga abyan kag mga mahal sa kabuhi—mahimo nga makakululba kag mabudlay. Indi dapat mangin amo sini. Ang pagmitlang sang espirituhanon nga mga eksperiensya ukon pag-istorya parte sa mga kahiwanan ukon mga hitabo sa Simbahang sa isa ka kaswal nga pag-inistoryahanay puede mangin

mahapos kag manami kon maggamtit kita sing diutay nga kaisog kag kaalam.

Ang akon asawa, nga si Harriet, isa ka maayo nga halimbawa sini. Sang nagapuyo kami sa Germany, makakita gid ina sia sang paagi nga malakip ang mga topiko parte sa Simbahan sa iya paghinambalanay sa iya mga abyans kag mga kakilala. Halimbawa, kon may mamangkot sa iya kon kamusta ang iya nagligad nga semana, mahambal ina sia, "Sang Domingo kanami sang amon eksperiensya sa amon simbahan! Isa ka 16-ka-tuig nga lamharon nga lalaki naghatag sang matahum nga mensahe sa atubang sang 200 ka tawo sa amon simbahan parte sa pagkabuhi sing matinlo nga kabuhi." Ukon, "Nahibaluan ko ang parte sa isa ka 90-anyos nga babayi nga naggantsilyo sing masobra 500 ka habol kag ginpanghatag ini sa humanitarian program sang amon Simbahan para ipanagttag sa mga tawo nga nagakinahanglan sa bilog nga kalibutan."

Sa masami, ang mga tawo nga makabati sini gusto pa gid makahibalo. Nagapamangkot sila. Kag ina nagapadulong sa mga oportunidad sa pag-istorya parte sa ebanghelyo sa isa ka natural, sigurado, di-mapilit nga paagi.

Sugod sang maimbento ang Internet kag social media, mas nangin mahapos karon ang pag-istorya parte sining mga butang sa mas kaswal nga paagi kaysa sang una. Ang kinahanglan lang gid naton amo ang kaisog agud himuong ini.

Mangin Puno sing Bugay

Kasubo nga mahapos kaayo nga mangin palaaway. Pirme ini nagakatabo nga nagapakibais, nagatamay, kag nagahusgar kita. Kon kita nagapangakig, nagapangaway, ukon nagapanglait sa mga tawo, indi na sila gusto nga makahibalo pa gid parte sa aton. Indi naton mahibaluan kon pila na ka tawo ang nagbiya sa Simbahan ukon wala nagbuylog tungod may isa nga nagbuya sang tinaga nga nakasakit ukon nakasaklaw sa ilo.

May sobra na nga kakulang sa pagrespeto sa kalibutan sa karon. Tungod indi mahibaluan kon sin-o ang mga tagsulat sa Internet, mas nangin mahapos ang maghambal sing makasakit ukon makasalaklaw nga mga butang sa Internet. Indi bala dapat nga kita, ang mga nagahandum nga mangin mga disipulo sang aton mapinalinggaon nga si Cristo, may mas mataas, mas maluluy-on nga talaksan? Ang balaan nga mga

kasulatan nagatudlo, "Magpamulong kamo sa [gihapon] nga may bugay, nga naunawan sang asin, agud nga makahibalo kamo kon ano ang dapat nga pagsabat ninyo sa tagsatagsa" (Mga Taga-Colosas 4:6).

Nanamian ko mamensar nga ang aton mga pulong mangin maathag pareho sang masanag nga langit kag puno sing bugay. Mahunahuna bala ninyo kon daw mangin ano ang aton mga pamilya, mga ward, mga pungsod, kag bisan gani ang kalibutan kon mahimo naton ining simple nga prinsipyo?

Mangin Puno sing Pagtuo

Kon kaisa labi ang aton pagdayaw ukon pagbasol sa aton kaugalingon kon pagahambalan ang pagbaton sang iban sang ebanghelyo. Importante nga panendumon nga ang Ginuo wala nagapaabot nga kita ang maghaylo.

Ang pagkahaylo nagakatabo indi paagi sa aton mga pulong kundi paagi sa diosnon nga mga paghikot sang Balaan nga Espiritu. Kon kaisa kinahanglan gid lamang sang isa ka pagsambit sang aton panaksihon ukon sang isa ka eksperiensya agud sugdan ang pagpahumok sang isa ka tagipusuon ukon pagbukas sang isa ka puwertahan nga sarang maggiya sa iban nga maeksperiensyan ang diosnon nga mga kamatuoran paagi sa mga pagpabatyag sang Espiritu.

Si Pangulong Brigham Young (1801–77) nagsiling nga nahibaluan niya nga matuod ang ebanghelyo sang iya "nakita ang isa ka tawo nga wala sing katanlas, ukon talento sa paghambal sa publiko, nga sarang lamang maghambal, 'Nakahibalo ako, paagi sa gahum sang Balaan nga Espiritu, nga ang Libro ni Mormon matuod, nga si Joseph Smith isa ka Propeta sang Ginuo.'" Si Pangulong Young nagsiling nga sang nabatian niya yadtong mapainubuson nga panaksihon, "Ang Balaan nga Espiritu gikan sa sinang tawo [nag]pasanag sang akon paghangop, kag ang kasanag, himaya, kag imortalidad [nangin] yara sa akon atubang."²

Mga kauturan, magtuo kamo. Ang Ginuo magapadako sang mga pulong nga inyo ihambil kag magapabaskog sang mga ini. Ang Dios wala nagapangayo sa inyo nga magpanghaylo kundi nga buksan ang inyo mga baba. Ang trabaho sang pagpanghaylo indi inyo—iya ina sang tawo nga nagapamatid kag sang Balaan nga Espiritu.

Tagsa ka Miyembro isa ka Misyonero

Mga pinalangga kong kaabyanan, sa karon nga panahon may tuman kadamo nga mga paagi para buksan naton ang aton mga baba kag ipaambit sa iban ang manami nga balita sang ebanghelyo ni Jesucristo. May paagi para sa tanan—bisan sa nagaalang-alang nga misyonero—nga magpasakop sa sinning dako nga buluhaton. Sarang kita makakita sang paagi agud magamit ang aton mismo nga mga talento kag mga huyog sa pagsuporta sang dako nga buluhaton sang pagpuno sang kalibutan sang kasanag kag kamatuoran. Sa aton paghimo sini, makit-an naton ang kalipay nga nagaabot sa ila nga matutom kag maisog agud “nga magtindog bilang mga saksi sang Dios sa tanan nga mga tinion” (Mosias 18:9).

MGA TANDA

1. St. Francis of Assisi, sa William Fay and Linda Evans Shepherd, *Share Jesus without Fear* (1999), 22.
2. *Teachings of Presidents of the Church: Brigham Young* (1997), 67.

PAGTUDLO GIKAN SA SINING MENSAHE

Isa ka epektibo nga paagi sa pagtudlo amo ang “pagpaisog sinang inyo ginatudloan sa pagpahamtang . . . sang mga lalab-uton [goals] nga makabulig sa ila sa pagkabuhi sang prinsipyo nga inyo gintudlo” (*Teaching, No Greater Call* [1999], 159). Binagbinaga ang pag-agda sinang inyo ginatudloan nga mainam-puon nga magpahamtang sang isa ka lalab-uton sa pagpaambit sang ebanghelyo sa isa ukon masobra pa ka mga tawo sini nga bulan. Ang mga ginikanan sarang maghinambalanay sang mga paagi nga makabulig ang mga magagmay pa nga kabataan. Mahimo man ninyo buligan ang mga miyembro sang pamilya sa pagpamensar ukon pagdrama-drama sang mga paagi nga mamitlang ang ebanghelyo sa isa ka regular nga pag-inistoryahanay kag mamensar sang ginapaabot nga mga kahiwanan sa Simbahan nga sa diin mahimo sila mag-imbitar sang isa ka abyan.

LAMHARON

Pagpaambit sa isa ka Abyan

Ni Adriana Vásquez

sa ka adlaw samtang nagatuon ako para sa akon klase sa seminary, may ara ako sang manami kag maathag nga pamatyagon. Samtang nagabasa ako sang leksyon para sa madason nga adlaw, nakita ko ang nawong sang isa ka abyan gikan sa eskwelahan kag may mabas-kog nga nabatyagan nga dapat ko ipaambit ang akon panaksihon sa iya.

Bisan pa nga tama kaathag sining pamatyagon, nahadlok ako. Nabalaka ako nga basi sikwayon ako sang akon abyan, labi na gid kay daw indi sia ang tipo sang babayi nga mangin interesado sa pagbuyllog sa Simbahan.

Ginpanumdom ko ang isa ka pamulong-pulong ni Sister Mary N. Cook sang general presidency sang Young Women kon sa diin ginhangkat niya kita nga magpisan kag mangin maisog.¹ Gusto ko mangin pareho sini, gani ginsulatan ko ining babayi kag nagsaksi sang kamatuoran sang Simbahan kag sang akon pagpalangga sa Libro ni Mormon. Pagkabwas ginsuok ko ang isa ka kopya sang Libro ni Mormon, upod ang akon sulat, sa iya bag.

Sa kakibot ko, ang akon abyan bukas kaayo sa pagpamati sa ebanghelyo. Sugod sadto nga adlaw, ginasugiran niya ako kon ano ang iya natun-an sa iya pagtuon sa Libro ni Mormon. Pila ka semana ang nagligad, ginpakilala ko sia sa mga misyonero. Halos insigida, nakabaton sia sang kompirmasyon gikan sa Balaan nga Espiritu nga ang iya ginatun-an matuod. Ako kag ang mga misyonero naghibi samtang ginasugid niya sa amon ang iya mga nabatyagan. Wala madugayi ang akon abyan ginbunyagan, kag ang iya mga ginikanan natingala gid sa mga pagbag-o nga natabo sa iya.

Nalipay gid ako nga nalampuwasan ko ang akon mga kahadlok kag nakabulig ako dala sang ebanghelyo sa iya kabuhi.

TANDA

1. Tan-awa sa Mary N. Cook, “Never, Never, Never Give Up!” *Liahona*, Mayo 2010, 117–19.

MGA KABATAAN

Sarang Ako Mangin Iwag sa Iban

Si Pangulong Uchtdorf nagasiling nga agud mangin iwag sa iban, ang aton mga pulong dapat mangin "maathag pareho sang adlaw kag puno sing kaayo." Ang aton mga pulong dapat malipayon, sinsero, kag malulo. Ano ang puede ninyo himuong ukon ihambal

agud mangin iwag sa iban? Sarang ninyo isulat sa inyo journal ang lima ka manami nga mga butang nga ginaplanoy ninyo ihambal sa mga miyembro sang pamilya ukon mga abyans.

© 2013 iya sang Intellectual Reserve, Inc. Tanan nga kinamatarong gina-huptan. Ginbalhag sa Pilipinas. Petsa sang pagtugot sa Ingles: 6/12. Petsa sang pagtugot sa paglubad: 6/12. Paglubad sang *First Presidency Message, February 2013*. Hiligaynon. 10662 861



Nahaylo sa Ginuo

Tun-i ining materyal sing mainampuon kag, kon nagakabagay, hambali ini upod sang mga sisters nga inyo ginabisita. Gamita ang mga pamangkot agud buligan kamo sa pagpabakod sang inyo mga sisters kag himuong ang Relief Society nga aktibo nga bahin sang inyo mismo kabuhi. Para sa dugang nga impormasyon, mag-logon sa reliefsoociety.lds.org.

Pagtuo, Pamilya, Bulig

Ang bag-o nga mga sisters sa Simbahan—lakip na ang Young Women nga manugsulod sa Relief Society, mga sisters nga naga-balik sa pagkaaktibo sa Simbahan, kag ang mga bag-ong hinaylo—tan-an nagakinahanglan sing suporta kag pagpakig-abyan sang mga visiting teachers. “Ang pagpartisipar sang mga miyembro importante sa pagpabilin sang mga hinaylo kag sa pagpabalik sang indi-gawa aktibo nga mga miyembro sa lubos nga pagkaaktibo,” siling ni Elder M. Russell Ballard sang Korum sang Napulo’g Duha ka mga Apostoles. Mag-angkon sang pananawan nga ang Relief Society . . . sarang mangin [isa sa] pinakamabaskog nga palasandigan sa pagpakig-abyan naton sa Simbahan. Magdab-ot sa gilayon sa sinang mga ginatudloan pa kag ginapabalik, kag palangga sila pasulod sa Simbahan paagi sa inyo organisasyon.”¹

Bilang mga miyembro sang Relief Society, sarang naton mabuligan ang bag-o nga mga miyembro nga magtuon sang tig-una nga mga buluhaton sa Simbahan, pareho sang:

- Paghatag sang mensahe.
- Pagpaambit sang panaksihon.
- Pagpangabuhi sang layi sang pagpuasa.

- Pagbayad sing ika-pulo ukon tithing kag iban pa nga mga halad.
- Pagpartisipar sa buluhaton sang family history.
- Paghikot sang mga bunyag kag kompirmasyon para sa ila nagtaliwan nga mga himata.

“Kinahanglan sing maatipanon nga mga abyan agud makabatyag ang bag-o nga mga miyembro nga komportable kag naabi-abi sa simbahan,” siling ni Elder Ballard.² Tanan kita, pero labi na gid ang mga visiting teachers, may importante nga mga responsibilidad sa pagpasad sang mga pag-inabyanay upod sa bag-o nga mga miyembro bilang isa ka paagi nga mabuligan sila nga mangin mapag-on nga “nahaylo sa Ginuo” (Alma 23:6).

Gikan sa Balaan nga mga Kasulatan

2 Nefi 31:19–20; Moroni 6:4

Gikan sa Aton Kasaysayan

“Sa tunga sang padayon-nga-nagadugang nga kadamuon sang mga hinaylo,” siling ni Pangulong Gordon B. Hinckley (1910–2008), “kinahanglan naton maghimo sing mas dako nga pagtinguha nga buligan sila sa pagpangita sang ila alagyan. Ang tagsa sa ila

nagakinahanglan sing tatlo ka mga butang: isa ka abyan, isa ka responsibilidad, kag pagbatiti sa ‘maayong pulong sang Dios’ (Moroni 6:4).”³

Ang mga visiting teachers yara sa posisyon nga buligan inang ila ginabantayan. Ang pagpakig-abyan sa masami nagauna anay, pareho sa isa ka bataon nga sister sa Relief Society nga amo ang isiting teacher sang isa ka mas may idad nga sister. Nangin mahinay ang ila pag-inabyanay tubtob nga nag-upod sila sa isa ka proyekto sang pagpaninlo. Nangin mag-abyan sila, kag samtang nagaistoryahanay sila parte sa Mensahe sa Visiting Teaching, pareho sila nga nabatiti sang “maayong pulong sang Dios.”

Si Pangulong Joseph Fielding Smith (1876–1972) nagsiling nga ang Relief Society “isa ka importante nga bahin sang ginharian sang Dios sa kalibutan kag . . . nagabulig sa iya sini matutom nga mga miyembro nga makaangkon sing wala’y katapusan nga kabuhi sa ginharian sang aton Amay.”⁴

MGA TANDA

1. M. Russell Ballard, “Members Are the Key,” *Liahona*, Sept. 2000, 18.
2. M. Russell Ballard, *Liahona*, Sept. 2000, 17.
3. Gordon B. Hinckley, “Every Convert Is Precious,” *Liahona*, Feb. 1999, 9.
4. Joseph Fielding Smith, sa *Daughters in My Kingdom: The History and Work of Relief Society* (2011), 97.

Ano ang Sarang ko Mahimo?

- 1.** Nagapangamuyo bala ako para sa akon kaupod kag nagapangayo nga ang Espiritu maggiya sa amon sa amon pag-alagad sa amon mga sisters?
- 2.** Sa ano nga mga paagi kami dapat magserbisyo sa tagsa ka sister nga ginabantayan namon agud mahibaluan niya nga naga-ulikid gid kami sa iya?